

## Ndipo Tutatambua,

*Jinsi ziliyo kuu utajiri na bekima na maarifa ya Mungu! Hukumu zake hazichunguziki, wala njia zake hazitafutikani! Warumi 11:33.*

**N**i lengo kuu la Shetani kuondoa mawasiliano yote yaliyopo kati ya Mungu na watu Wake, ili aweze kutenda hila zake za udanganyifu bila kuwepo kwa sauti inayowaonya juu ya hatari inayowakabili. Ikiwa ataweza kuwasababisha wanadamu kumshuku mjumbe, au kutoambatanisha utakatifu kwa ujumbe Wake, anatambua kwamba watajihisi kuwa hawana wajibu wa kutii neno la Mungu. Na pale nuru itakapoonekana kama giza, Shetani atakuwa amefaulu.

Mungu wetu ni Mungu mwenye wivu; Hapaswi kufanyiwa mzaha. Yeye afanyaye mambo yote sawasawa na mapenzi Yake anapendezwa kuwaweka watu katika mazingira anuwai, na kuwapatia majukumu na mambo ya kuzingatia ya kipekee kutokana na nyakati wanazoishi na masharti waliyowekwa chini Yake. Ikiwa watathamini nuru waliyopewa, uelewa wao utakuzwa na kuadilishwa na fikira pana za ukweli zitafunuliwa kwao. Siri za mambo ya umilele hasa kuhusu neema ya ajabu ya Mungu kama ilivyofunuliwa bayana katika mpango wa ukombozi, zitafunuliwa katika akili zao; maana mambo ya kiroho hutambuliwa rohani...

Yesu anasubiri akiwa na shauku kuu kufunua kwa watu Wake utukufu utakaoonekana katika ujio Wake wa mara ya pili, na kuwachukua kuwapeleka katika tafakuri ya mandhari ya furaha kamili. Kuna maajabu yatakayofunuliwa. Maombi na utafiti mrefu wa maisha yote vitaacha mengi ambayo hayajafanyiwa tafiti wala kupata maelezo ya kutosha juu yake. Lakini kile tusichokijua sasa kitafunuliwa baada ya hapa. Kazi ya kutoa maelekezo inayoanza hapa itaendelea hadi katika umilele. Mwana-kondoo atakapokuwa akiongoza jeshi la waliokombolewa kuelekea katika chemchemi ya maji ya uzima, ataweka kwao akiba kubwa ya maarifa; atafumbua mafumbo ya kazi na mapenzi ya Mungu ambayo hayakueleweka hapo mwanzo.

Kamwe hatuwezi kwa kupitia kufanya utafiti kumfahamu Mungu. Haweki wazi mipango Yake katika akili za wachunguzi na wadadisi wa kibinadamu. Tusijaribiwe kufunua kwa kiburi pazia linalofunika Ukuu Wake. Mtume anatangaza kuwa, "Hukumu zake hazichunguziki wala njia zake hazitafutikani!" Ni uhakikisho wa rehema Zake kwamba nguvu Yake imefichwa, kwamba amefunikwa kabisa katika wingu la siri na uvunguvungu; maana kufunua pazia lililoficha Uwepo wa Mungu ni kifo. Hakuna akili ya mwanadamu mwenye asili ya kufa inayoweza kuelewa siri ya uweza Wake ambao Yeye aliye Mkuu huishi na kufanya kazi ndani Yake. Hatuwezi kamwe kutambua utendaji Wake kwetu na matilaba Yake inayomsukuma kufanya jambo ikiwa hataona vyema kulifunua kwetu. Anaamuru kila jambo kutendeka kwa haki na hatuwezi kutokuridhishwa na kutokumwamini Yeye, bali tutasujudu kwa kicho na utii. Atafunua kwetu mapenzi Yake kadiri itakavyokuwa kwa mema yetu kujua; mbali na hayo tunapaswa kuamini mkono Wake wenye uweza wote, moyo Wake uliojaa upendo (*The Review and Herald*, Aprili 7, 1885).